

# Ina giatta cotschna ed intelligenza artificiala – en discurs cun il poet

«Terra pels peis» da Linard Bardill è gist or da stampa. Il cudesch liric en vallader e tudestg vegn preschentà questa saira a la vernissascha en la libraria Lüthy a Cuira. La FMR ha visità l'autur en ses atelier a Scharans ed el ha tradi intginas ponderaziuns ch'el haja fatg cun scriver duas poesias.

CLAUDIA CADRUVI/FMR

Cun leger ina poesia fan patratgs turnighels. Associazius sautan ringaraja. Ina poesias po evotgar in sentiment u regurdar ad in mument emblidà. Ma èsi propi il vair? Èsi ils medems patratgs che l'autur sez ha fatg durant scriver sia poesia? U manegia lez forsa insatge tut auter?

Durant la visita da la FMR lascha *Linard Bardill* filar a moda spontana ses patratgs tar duas da sias poesias.

*No surgnin bainbod  
ün giat  
o il giat survain a no  
quai nu satja precis  
a la fin dals quints n'ha eir jau  
surgnü üna vita  
o forsa listess viceversa  
la vita ha surgnü a mai*

*Lura vess la vita  
tut ün ris-ch  
ter bluord*

*Chi saja sco chi vöglia  
jau m'allegri sül giat  
e sper  
chal giat varà plaschair da mai*

Naschida saja questa poesia cura che sia famiglia spetgava in giat, di *Linard Bardill*. «Ti na pos decider co che quai gnarà cun quest giat.» Ed uschia raquintia la poesia dad ina vart da la fidanza en la vita e da l'autra era dal ristg da la vita.

## Il ristg d'ina relaziun

«Il ristg che questa vita porta a nus umans è dad esser pront da prender si contact cun tgi ch'igl è. Quai è listess sch'igl è in giat, in bostg, in uman u mia figlia che sto far in test en scola ch'ella è segira ch'ella va be giu per l'assa. Il ristg da la vita è da confruntar cun relaziuns, dad esser pront e perdert dad ir en ina relaziun.»

E per turnar tar il giat che ha inspirà la poesia: La finala saja quai stà ina giatta cotschna ch'è vegnida tar ils Bardills. «In'orma da giat. Incredibel. Ina giatta che gida la donna da far lavur da terapia e che sesa adina là nua ch'i dat problems. Ina giatta da tschel mund», di Linard Bardill.

Igl avess era pudì esser auter, in giat che sa dispita adina cun auters giats. Quai saja il ristg dad ina relaziun. «Ma il ristg da restar sulet e senza relaziun è bler pli insupportabel.»

## I sburfla or dal cor

«Quant jent» è il titel da la seconda poesia. Ella cumenza cun rimas che regardan l'emprim bunamain a quellas d'ina chanzun d'uffants ed ella daventa vers la fin adina pli filosofica.



Fabular e chantar è ses grond dun tant per rumantsch sco per tudestg – **Linard Bardill preschentà in nov cudesch.**

FOTO CLAUDIA CADRUVI

*Jau less esser la leivra  
chi cuorra  
tras la planiura cuvernada da naiv  
il floc da naiv chi salüda sün fanestra  
Quant jent füss jau la glüm  
chi splendura illa s-chürdüm  
la foura aint il mür  
il spazi tanter las stailas  
il vöd tanter ils atoms*

*Jau nu sun quai  
e sun listess tuot quai  
jau vez il muond suot meis peis  
co ch'el sbuorfla  
our da la chombrä zoppada  
da meis cour*

A la dumonda co che questa poesia saja naschida, recorda Linard Bardill a la meditaziun dals zens. Cun lezza empovrian ins da cuntanscher in stadi dal esser vid – quai reusseschia sin il pli per in mumentin.

Da l'autra vart haja mintga uman la capacitat da crear en sai l'entir univers u insumma tut quai ch'existia sin il mund, forsa ina lieur sco en la poesia. Uschia statti scrit en la poesia, i «sburfla tut or da la chombrä zoppada da mes cor».

## Cor u «sammelsuri da savida»

Quai saja in miracul. E là tegnia l'umanitat sin distanza l'intelligenza artificiala. Lezza saja in sammelsuri da savida. «Ma noss cor è in lieu nua ch'i vegn creà il mund, l'univers, la via da

latg. Jau nun ha uschè tema da l'intelligenza artificiala. Ella farà in grond battibugl. Ma sche nus nun ans laschain metter in pigna avain nus bunas schanzas da surviver quai.»

Il sammelsuri da sapienza na saja betg uschè potent sco la forza da l'amur, da la glisch e da la creaizun, di Linard Bardill.

E tut questas ponderaziuns – e numerusas autres associazius da lecturs e lecturas – han plaz en paucas lingias e paucs pleuds d'ina curta poesia.

La vernissascha cumenza gievgia saira da las 19.30 en la libraria Lüthy a Cuira. Astrid Alexandre fa musica.



«*Terra pels peis – Den Füssen ein Grund*» da Linard Bardill cumpara en la Chasa editura rumantscha.